

Arzalluz: «Madrilek esaten diguna egingo bagenu ibiliko ginateke benetan oker»

EAJk Leizaola erbestetik itzuli zeneko hogeigarren urtemuga gogoratu du

Joseba Arruti / Bilbo

Atzo hogeitau urte bete ziren Jesus Maria Leizaola lehendakaria Parisko erbestetik itzuli zenetik. Hori dela eta, EAJk ekitaldi bat egin zuen Bilboko Carlton hotelean. Ibarretxe lehendakaria Gasteiztik joatekoa zen, baina elurra zela-eta ezin izan zuen. Xabier Arzalluzek ekitaldian bildutakoei esan zenez, «atzo bezala, gaur ere Madrilen aurrean otzana ez bazara, lintxatu egiten zaituzte».

XABIER ARZALLUZ Euzkadi Buru Batzarreko lehendakariak atzo Leizaola lehendakariaren itzulera gogoratzeko bere alderdiak antolatutako ekitaldian adierazi zuenez, «EAJ apustu sendoa ari da egiten herri honetara bakea ekartzeko, eta, horren truke, Madrilen manipulatzeko eta gezurretan ari dira». EBBko presidentek aitortu zuen «bide horretan hanka sartzeko arriskua» daukela bere alderdiak, «baina argi daukagu Madrilen esaten digutena egingo bagenu ibiliko ginatekeela benetan oker». Haren iritziz, «edo otzana zara Madrilen aurrean, edo lintxatu egiten zaituzte. Hori iraganean jazo zen, eta gaur egun ere berdintsu jarraitzen dugu».

EAJk Euskal Herrian abian jarritako prozesu politikoan hartu duen jarrerarengatik jasotzen dituen kritiken inguruan, Europako beste zenbait herrialdeetako gobernuen jokabidea aipatu zuen Arzalluzek. «Erresuma Batuak ipar irlandarrei eurek nahi dutena izateko eskubi-



Goian, Garaikoetxea, Ibarretxe eta Ardanza, atzo Ajuria Enean eginiko ekitaldian; alboan, Arzalluz, EAJko kideen aurrean hitzaldia egitera zihoala.

dea aitortu die, herrialde horrek izan dituen deskolonizazio prozesu ugarietan baliatutako formula bera erabiliz. Frantzian, Jospinek

Korsikako ordezkari politikoak hartu ditu Matignonen, hango HB barne; eta hemen, bitartean, Konstituzioa eta Estatutua dira gainditu ezi-

nezko tresnak. Horiekin bueltaka ari dira behin eta berriro.

ETAren jarrera ere salatu zuen Arzalluzek. «Badakigu

ez zaigula beste 36 bat etorriko, beste marko batean bizi garelako eta armadak iraganeko kontua direlako; hori da ETAK ulertzen ez duena. Autista batzuk dira».

Leizaolaren goraipamena

Jesus Maria Leizaola *lehendakari zaharra* erbestetik itzuli zenetik hogeitau urte bete ziren egunean, EAJk hura goraipatu zuen. Carlton hotelean egindako ekitaldian Ibarretxe lehendakaria, Jose Antonio Ardanza eta Leizaola sendiko zenbait kide ziren parte hartzeak, baina elurrak bertan egotea eragotzi zien.

Xabier Arzalluz, Iñaki Anasagasti eta Iñaki Azkunak hitzaldi bana eman zuten Leizaola gogoratzeko. Hirurek aipatu zuten, «Leizaolari oso garai gogorra bizitzea egokitu zitzaion eta beti jokatzen zuen duintasun handiz».

«Leizaola belaunaldi oso baten isla da», esan zuen Iñaki Anasagastik. Gerra zibilaren hasieran EAJk eginiko hautua aipatu zuen Arzalluzek. «EAJk, bere kristau joeraren gainetik, demokraziaren aldeko apustua egin zuen eta hala egin izan ez balu gaur desagertuta egongo zen».

Garai hartako EAJren barruan, «heroiak ez ezik, traidoreak, aprobeztatu zirenak eta beldurtiak ere egon» zirela aipatu zuen Xabier Arzalluzek, eta Jose Antonio Agirre eta Jesus Maria Leizaola «euren herriarenganako konpromisoaren adibideak» jarri zituen. Haren esanetan, «orduko arrisku nagusia beldurra izan zen, eta gaur egungoa dirua da».

Leizaolak «euskal unibertsitatea sortu» zuela ere gogoratu zuten hizlariak eta erbestetik itzuli zenean ez EHUK eta ezta Deustuko unibertsitateak ere *honoris causa* izendapena eman nahi izan ez ziotela kritikatu zuten hizlariak.

EAJko buruzagi gehienek parte hartu nahi izan zuten Leizaolaren omenaldian

EUSKO ALDERDI JELTZALEKO aurpegi ezagunenetako asko Carlton hoteleko Imperial aretoan bildu ziren atzo arratsaldean Leizaola lehendakaria erbestetik itzuli zeneko XX. urtemuga gogoratzeko.

Gonbidatuak arratsaldeko zazpietan hasi ziren biltzen Carlton hoteleko hallean. Ber-

tan egon ziren, besteak beste, Javier Atutxa BBBko presidentea, Gorka Agirre EBBko kidea, Iñaki Zarraoa Getxoko alkatea, Andoni Ortuzar EITBko zuzendaria edo Luis Maria Retolaza barne sailburu izandakoa.

Zazpi eta erdiak pasatxo zirenean, Iñaki Anasagasti iritsi zen, Sindikatik zuzenean.

Aipatu zuenez, Madrilen egon behar zuen kazetari parlamentarioen sari bat jasotzen, «baina nahiago izan dut hemen egotea».

Ekitaldia burutu zen aretoan, Leizaola hegazkinetik jaisten ari zen argazkiaren aurrean egin zuten berba Xabier Arzalluzek, Iñaki Anasagastik eta Iñaki Azkunak.

Ibarretxe: «Azken 14 urteetan baino gehiago aurreratu da hilabeteotan»

AJURIA Eneko jauregian ekitaldi instituzionala egin zen goizean Jesus Maria Leizaola zenaren omenez, eta han bai egin zuten bat Juan Jose Ibarretxek, Eusko Jaurlaritzako lehendakariak, eta haren aurretik kargu bera bete zuten Jose Antonio Ardanza eta Carlos Garaikoetxeak. Leizaolaren alaba,

Itziar, eta iloba, Joseba Leizaola (Eusko Legebiltzarreko lehendakari izandakoa), ekitaldi hartan izan ziren.

Ibarretxek hitzaldian nabarmendu zuenez, «Leizaola bere aberria izugarri maite zuen gizona zen, baina tinkotasun berarekin defenditu zuen bakea. Jazarria izan arren, ez zuen erantzun biolen-

toetarako tentaziorik izan».

Bakea Euskal Herriak duen eskubidea ez ezik, beharra ere badela esan zuen. Bide horretan, azken urtean «joandako 14 urteetan baino gehiago» egin dela bakearen alde adierazi zuen. Bestalde, Madrilek abertzaleen ideiak «deabrutzea» gaitzetsi zuen.